

四庫全書

集部

欽定四庫全書

文忠集卷六十三

平園續稿二十三

宋周必大撰

神道碑三

朝散郎充集英殿脩撰林公

光朝

神道碑

慶元三年

子貢問鄉人皆好之何如孔子答以不如鄉人之善者
好之孟子告齊宣王以諸大夫曰賢為未可必國人皆
曰賢然後察之用之是二者古今觀人之要術於吾父

軒猶信初予與著作佐郎劉夙賓之為同年進士後識
故相陳正獻公皆莆人也賓之博洽剛介正獻道德隆
重其不輕許可則均每論其鄉之人物賓之曰父軒吾
師也正獻曰父軒吾友也後予官太學會諸生則亦人
人推林父軒蓋其博學篤志手不釋卷出入起居必中
規矩事親孝御下仁行已恭執事敬勇於義審於思善
并美具為當世所宗然未嘗著書惟口授學者使之心
通理解常曰道之全體存乎太虛六經既發明之後世

注解固已支離若復增加道愈遠矣文辭古雅不事雕
鏤如清廟朱絃可一倡三歎也五十方奏名則有命焉
於時朋游若門弟子宦達已多交賀於朝區區一第何
足為公重欲其因仕行道耳夫未仕而鄉人之善者以
為師友通國之人皆謂之賢既仕則又為之喜由是天
子察而用焉茲豈聲音笑貌所能致哉誠之不可掩也
如此艾軒公自號也隆興元年調袁州司戶叅軍未上
召對改左承奉郎知永福縣大臣論薦不已召試館職

乾道五年七月遂入秘書省為正字兼國史編脩實錄
檢討官六年佐著作兼司勳司封郎官七年遷著作郎
兼郎禮部八年進國子司業兼皇太子侍讀史職如故
九年請外以直顯謨閣提點廣西刑獄淳熙改元易使
東路二年茶寇自荆湖剽江西薄嶺南其鋒銳統制路
海本路鈐轄黃進各以其軍分控要害會有詔徙公轉
運副使公謂賊勢方張留屯不去督二將遮擊俘獲相
繼賊驚懼宵遁上聞之喜曰林某儒生乃知兵也加直

寶文閣明年召拜國子祭酒兼太子左諭德四年二月
乙亥駕幸國子監命講中庸上大稱善面賜金紫己丑
除中書舍人為誥有古風坐繳奏新御史除目改權工
部侍郎請外以朝散郎充集英殿脩撰知婺州引疾提
舉江州太平興國宮五年五月六日卒此其出處大畧也
公諱光朝字謙之世為興化軍莆田人曾祖南一祖繁
父勉贈奉議郎母恭人曾氏享年六十有五是歲十月
二十日葬本縣麥堆原之北娶徐氏封恭人六子今存

者宜季能季某官一女適某人猶子成季力學而賢為
公作家傳正獻公又作祠堂記凡公行誼閥閱已詳而
其子姪復以先志來求墓隧之碑予念昔在兩省公適
登第典貳秘書公來著庭佐春官公為郎掌史事公為
僚晚忝宮端同事壽康皇帝前後五聯官曹大而道德
性命之理無不講內而閨門寢食之私無不及讀書未
達賴公析疑屬文未工咨公指瑕平居相愛殆同天倫
公之本末皆親見熟察非但傳聞而已是宜為銘其銘

曰

南賢好脩志誰不勤汲古纂言業誰不精孰如林公
好學而醇所持者正所勉者誠身猶布衣人曰公
卿年未強仕人曰老成時雨之教其化也深水上之
風渙然有文瞻彼莆中冠蓋如雲祭公於社過者必
欽

資政殿大學士毗陵侯贈太保周簡惠公神道

碑慶元四年

高宗皇帝足馬渡江中興炎祚其豐功盛德固不容盡
述竊窺大要以仰成宰輔信用臺諫為本三十六年間
命相不一自今觀之激士氣復故疆張丞相浚之心也
固根本俟機會趙丞相鼎之志也專持國柄一意和好
者秦丞相檜也三相所主雖不同其人才進退政事弛
張是非得失公論各不可揜至於身任安危則一而已
當是時言路固多名臣其視力輕重而為向背亦或有
之惟毗陵周簡惠公以乙卯歲趙張並相之日四月八

臺十月進殿中侍御史在職僅兩月言事至三十章大抵謂自治其國乃能成功今外有強敵內有羣盜不可事虛文貽實禍歷條時政二十餘事指宰相不任職上變色曰趙鼎張浚肯任事須假之權奈何遽以小事形迹之公徐奏陛下有過尚望大臣盡忠今臣一及大臣便是形迹使彼過而不改罪戾日深非所以保全之上改容曰此論甚奇最後連章極論趙子直語侵趙公又論張公大舉北伐繫國存亡坐是不得其言而去迨

秦公獨相意公必憾趙鼎拔公入臺公語人曰元鎮已
貽某固不言雖門下客亦不及也一日內降差除四人
公言願陛下以仁祖為法大臣以杜行為法又歷疏三
大弊秦怒甚不數月改左史因是流落於外十六七年
秦薨始為禁從席未暖復去國孝宗即位公與張燾辛
次膺任古首被召初對有繩愆糾繆之諭會上以張公
為樞密使督師江淮銳意恢復而公素不以亟戰為然
命佐夏官明年六月符離退師乃超拜政府其後湯丞

相思退與張公並相或戰或和多取決於上而其實客
議論間失之偏公始終守自治之說是則曰是非則曰
非不將不迎不諂不訐表裏洞達無一毫之偽又明年
四月張公罷十一月湯公亦罷工再起陳丞相康伯敵
已約和國論始定時公在政府一年有半矣因墜馬敗
面傷手刃力請去上不得已久乃從之其立朝本末如
此所謂非苟知之亦允蹈之者歟公諱葵字立義常州
宜興縣人曾祖密贈太子太保祖璟贈少保父裕朝奉

郎致仕賜緋魚袋贈少師妣秦國夫人王氏公少力學
自鄉校移籍京師兩學傳誦其文宣和六年廷試以歷
數為問公既詳對又為說曰聖人兼天地之職一物不
遂必任其責凡易之大衍內經之五運六氣書之閏月
定四時老氏一生二二生三三生萬物皆當裁成輔相
以實之然後可以和同天人之際考官嗟賞擢寘甲科
調廣德軍司刑曹事靖康覃恩循脩職郎用舉王陞文
林郎知徽州軍事推官車駕移蹕臨安諸軍交馳境上

守死倅易公與判官攝行郡事隨機應變千里帖然初
大觀間諸郡增賦物帛其後赦書已蠲減而漕臣便文
復取於民公白新守力止之訖公去乃增如故薦章交
上改通直郎臨安府府學教授未赴吏部侍郎陳與義
密薦公遂召試館職將試復引對上曰從官多說卿端
人正士面除監察御史紹興五年也尋充省試叅詳官
開院適輪對論內外兵勢上密以措畫與公議信嚮方
深既為副端論事不合徙司農少卿四求去皆不允兩

召至都堂諭旨二相云以言求去非朝廷美事公曰某
離言路半年自以親老家貧請外耳乃除直秘閣知信
州屢展戍期趙公罷張公當國陳公與義執政改河南
提點刑獄公事以遠求易浙西又避本貫易江東四歲
四易地迄未嘗至八年冬和議已定公復被召論為國
若有道戰則勝守則固和則久不然三者在人不在我
矣九年二月除太常少卿五月再為殿中既不合會傳
某人賜出身除兩府公又將論之携疏至殿幕改起居

郎有詔侍從兩省薦西北人才公同給事中劉一止薦
呂廣問廣問叅政李光客也擬試館職秦不可謁告不
入言者論罷李併謂公受其風指十二月黜主管洪州
玉隆觀十年郊恩復直秘閣十二年春起知湖州十三
年正月移平江府復以郊恩賜服緋魚北方初脩聘勅
使絡繹公不為禮又積與轉運議論不協共劾公設宴
菲薄十四年二月落職主管台川崇道觀屏居鄉閭二
親益老家益貧憂患連年不能堪公獨安之二十五年

十二月復舊職知紹興府二十六年正月遇闕除權尚書禮部侍郎賜紫章服兼國子祭酒又兼權給事中言路忌之三月出知信州太學生列狀留公不報居數月復罷郡二十八年起知撫州引道疾作改提舉江州太平興國宮十月直龍圖閣知太平州水壞圩岸公大加脩治凡百二十里傍郡諸圩皆沒惟當塗歲熟市河久堙雨暘交病公下令城中家出一夫官給之食併力浚導公私便之三十年八月進集英殿脩撰尋移婺州加

敷文閣待制當江上用師調度繁興不擾而辦三十二年七月除兵部侍郎時孝宗初政增置講官九月首命公兼侍講積官左朝散大夫隆興元年同知貢舉戶部闕官兼權侍郎上數批問錢穀出入公奏陛下勞心庶務日有諮詢若出人意表足以聳動觀聽今皆徵文細故此必有小人乘間獻忠欲售其私不可不察蓋指龍大淵曾覲也上色為動自完顏亮斃襄闕雖兩軍相持而移文議和不絕張公自督府來朝密為上言敵失

泗州其守官蒲察久安大周仁寄治虹縣懼罪皆欲來
歸願遣軍渡淮赴之此恢復之機也二相皆不與聞公
請對謂不可輕舉累數千言上唯唯五月李顯忠將騎
將邵宏淵步兵共十餘萬取虹縣下靈壁既克宿州二
帥始不協虜兵擊顯忠軍宏淵不肯援幸勝負相當至
暮我師入城明日虜亦解去金帛山積顯忠不以犒軍
衆怒而潰敗書聞上思公言以左中大夫叅知政事正
謝畢朝德壽宮門無宿衛廷無閣門公乞輪差從之故

事初拜相賜銀絹二千疋兩執政半之辭則減半例自行首司申御藥院取旨公命勿申遂已每便朝二府先共呈機速房事既畢宰相兼樞密使自與其二次呈西府文書叅政稍退一日西府擬居實浙西總管上連問如何相樞皆無語上顧公問可否公前奏曰是人頃為御前買北貨乾沒萬計公論必不可上乃却其除目後數日公留身上曰昨居實差遣不同議耶公曰此西府事臣不預也是時金雖主和而其右丞相兼都元帥布

色忠義左副元帥赫舍哩志寧握兵淮北專任邊防嘗以書達三省密院大畧謂方議遣使遽乘不脩攻我符離無乃為將臣所誤妄要功利乎今治兵決在農隙舊疆歲幣如約則止衆謂彼不以興師歸過朝廷及督府反為我設詞罪將臣其欲和可見矣上令答書差右宣教郎假樞密院計議官盧仲賢右宣議郎假將作監主簿李拭充通書官拭以妹為金主妃辭行命都轄官王抃代之十月末仲賢等與金帥議定為叔姪國上曰金能

以太上為兄朕所深喜詔遣從臣為通問使而以右宣
議郎胡昉假樞密院編脩官脩武郎楊由義假樞密院
管幹公事充國信所審議郎官臺諫交章言議和太速
公與陳湯二相乞令侍從臺諫集議衆益洶洶諸公待
罪乞罷不許公獨留身固請上曰卿何請之力也對曰
臣誤蒙知遇欲為陛下正綱紀今不可得而正也上曰
何為不可公曰政出於一則綱紀可正今朝廷督府左右
前後之臣皆欲自行其言此臣欲去者一也臣初為言

官晚忝侍從事有不可大即奏論小則堂白言雖不從臣責塞矣固無愧於心也出而為州事苟難行反覆論之不從則委曲行之使百姓不至受弊亦可無愧於心也惟預政以來每與宰相論事有以爲然而從者有不得已而強從者有絕不肯從者十常四五暨至榻前陛下又或不然大率小事之中勉書者七八安得不愧於心此臣欲去者二也上察公誠不以為罪第不許其去議者多請幸金陵公曰車駕一動能保德壽不為浙東

閩中之行乎他日上又欲先下詔公曰陛下能行數事
警動天下乃可上問其目公曰臣自初對便乞迎還太
上於大內盡發內帑付有司勿令近習干政汰溢頤內
侍罷擊鞠節飲燕內治舉然後可攘夷狄上稱善嘗因
灾異詔羣臣直言公請擇其可者行之上曰類摭摭細
故耳公又及前數事至議用兵不可輕有一擲賭乾坤
之語上曰今戰雖不足守則有餘公曰措置未善政事
未修雖守亦難同列皆甚其言退謂公上不能堪明日

公留身謝上更獎其直且曰聞卿在中書事事力爭朕甚嘉之二年正月胡昉楊由義見金帥於亳州逼昉等拜乃求還四郡昉等不可械繫月餘上怒詔張公行視師叱復遣戶部侍郎錢端禮吏部侍郎王之望充兩淮宣諭使張公尋罷以湯左相都督軍馬太傅和義郡王楊存中為同都督改宣諭為叅贊軍事會盱眙又報北界來有所議上方遣魏杞康濟充通問使副而忠義志寧二人遽引兵分犯濠滁志在邀盟於是臺諫詆宰執

主和誤國太學亦上書乞斬大臣公與相叅並乞罷黜
上密以書示公公曰初不及卿乃止詔留思退領都督
於朝以叅知政事王之望充督視公曰臨陳易將古人
所忌奈何移都督於陞辭之日況存中已為同都督之
望乃見執政反出其下願正稱謂使之速往號召諸將
併力捍敵上大以為然亦升之望同都督明日之望又
乞專委存中毋貳其權上復從之存中遂都督軍馬而
湯罷先是副樞洪遵罷上命公兼知密院事公以祖諱

辭詔免繫私銜已而召用賀允中不兩月允中再致仕
公兼領如故軍國事繁悉心裁決持論正平甚得士心
湯相就貶道亡公乞許歸葬上惻然曰何至是耶胡侍
郎銓郊前與郡公奏銓以直言久謫嶺海今將任子壞
之可乎上皆嘉納嘗乞召用侍從臺諫上曰安得如卿
直諒者公薦李浩龔茂良上皆以為佳士次第用之太
常言郊牛斃公奏春秋飢鼠食牛角免郊况邊虞未靖
請展郊以符天意事下有司或引春秋傳晦日為天忌

乾德元年藝祖初郊以冬至近晦日改用十六日甲子
至道元年當郊而李繼遷叛亦改次年今冬至適近晦
日兩淮復用兵當候來年恭見上帝詔從之時再遣武
翼大夫閤門宣贊舍人國信所幹辦公事王忬使北軍
而擢錢端禮虞允文執政閏十一月新相陳公亦視事
公即奏臣向因顛墜求退聖諭廟堂無人令力疾少留
今康伯已相執政又有人可以去矣宣押數四陳相亦
乞留公公請益堅乃除資政殿學士提舉臨安府洞霄

宮陞對上曰卿筋力未衰他日宣召勿辭公奏臣今年六十七三二年不死亦合掛冠上為悵然未幾王忭使歸金自滁州退師和議成矣乾道三年三月起知泉州明年復請祠六年告老章五上加大學士致仕間遘累年不以世故縈心惟究極死生之說淳熙改元正月十二日薨於里第享年七十有七上聞震悼贈正奉大夫後以子升朝累贈太傅爵自宜興縣開國子加至毗陵郡開國侯食邑通一千一百戶食實封二百戶娶李氏

同安郡夫人累贈魏國夫人前卒葬縣東清泉鄉梅林之原明年正月己酉公合葬焉四年太常考功議以正直無邪曰簡寬裕不苛曰惠易公之名人以為允四男長樅從事郎點檢贍軍激賞酒庫所主管文字季楷宣教郎知臨安府臨安縣丞皆早世棟今為朝奉大夫新知辰州林朝散郎淮南路轉運司幹辦公事賜緋魚袋女桂適朝散大夫知雷州鮑同孫男十二人大年儒林郎監總領四川財賦軍馬錢糧所戶部魚關大軍倉大

辯承議郎新知和州含山縣大壯通仕郎次大本將仕郎次大中次大昌寄理從事郎新差監總領淮西江東軍馬錢糧所市易抵當庫次大猷大直大任大翼大雅大經孫女十二人公孝於親尤睦宗族當任子先孤姪謝事徧奏諸弟之子其薨也幼子與孫尚未命平生問學不泥傳註嘗論大學物格而后知至以謂在人之至為知在物之至為道以吾之知極物之道如兩物相抵故謂之格夫物萬不同道一而已方其格物物我為二

及其物格則自視無我何有於物是謂知至作聖
傳詩二十篇行於世文集三十卷奏議五卷晚自
號惟心居士昔壬辰歲公年七十有五予自小宗
伯奉祠居過陽羨別公里第臨分執手公意眷眷
若有所屬後二年而公薨棟等推原先志以著作
佐郎李遠所述行狀屢來請銘其猶子檜用公奏
入宮今掾廬陵日道二子之意趣如約義不可辭
銘曰

惟幾惟康古倚良弼耳目股肱衛上則一降及後世
其職乃析越在臺諫箴規排擊進居廊廟將順輔
翼前之責人今以自責躬或不逮言孰底績惟簡惠
公端諒篤實和戰何常隨時應敵其在我者自治吾
國時雖不同論則無易或從或違有始有卒皇心褒
嘉士論厭塞我作銘詩追紀賢德一言蔽之主聖臣
直

中大夫秘閣修撰賜紫金魚袋趙君善俊神道

碑 慶元五年

君諱善俊字俊臣太宗皇帝七世孫曾祖仲營崇信軍
節度使開府儀同三司追封成王妣楚國夫人王氏祖
士嘗登進士第終左承議郎贈中奉大夫妣令人石氏
父不哀任閩路兵馬鈐轄家於邵武贈大中大夫母碩
人滿氏君幼力學強記為文日數百言年十六薦名南
宮紹興二十一年以取應補承節郎監南嶽廟又六年
中文科以忠翊郎換左承務郎知南城縣丞三十二年

轉承事宣教郎簽書昭信軍節度判官廳公事明敏練達遇事風生太守以名聞孝宗方留意人物虞丞相允文亦薦君有邊帥才乾道三年堂選幹辦諸司審計司五年兩易提轄榷貨務都茶場六年夏求補外使親知郴州陞辭敷奏詳華上喜曰宗室乃有斯人留為太府寺丞發左帑奸弊人服其能兼權度支郎官歷奉議承議朝奉郎十二月擢淮南轉運判官分治西路兼刑獄茶鹽帥郭振卒詔君攝事明年就除直秘閣知廬州歲

旱浙江饑民麋至君既竭力周恤仍括境內荒熟官田
三萬六千餘畝分三十六圩請凡土著流移視力均給
而貸以牛種生者予屋死者給槨條具奏上詔大理寺
主簿薛季宣同君措畫竟亦不能易也廬故土曠人稀招
耕戶一率費緡錢數十君因流民仰食為裁其直主客
俱利戶口日增嚴戒團甲隊長毋以徭役擾之仍乞給
復五年大稱上意八年進直徽猷閣上手札問今歲二
麥幾何經旱乾者何以賑之君奏麥已登場并䟽耕種

次第上就委君廉問官吏貪殘刑獄冤濫其倚信如此
州城舊為金人所夷郭振脩築未竟君自詭續其功詔
金陵都統司共圖之君言異時恃焦湖以通饋鍾今湮
涸當浚鄉兵舊保孤姥二山且儲粟焉今屋壞闕願輟
州財充其費脫敵敗盟則吾守城之兵餉道無乏守險
之民至者如歸矣又陳軍政三弊及招萬弩手補神勁
軍之闕稍旌民兵武勇者以勵其餘禁奸人盜馬淮北
事多施行於是大脩學校新闕忠肅包孝肅公祠廣姚興

廟春秋嘗奉文武之士歸心焉詔以職事入覲上嘉獎
再三遂令再任九年春召為考功員外郎年勞邊賞轉
朝散請即朝奉大夫七月罷主管台州崇道觀纔半歲
上思君籌邊復召赴闕道除知襄陽府其臨遣也諭以
金泛使在此故擇重鎮付卿加直龍圖閣淳熙元年也
至則治民整軍如合肥時亦有盜馬北界者對境執以
來君受而戮之邊人畏服轉朝散大夫十二月移漕淮東
士民挽留間道乃得去以親老請閒從知婺州未上求

守甌寧去家僅二百里三年奉雙親開府閩人以為榮
君因俗而治痛懲不舉子者凡產育給金穀如格仍捐
俸助之會淮西再謀帥四年復知廬州君言和好不可
恃戍兵不可罷城濠不可不濬軍士屯田費大利微罷
之便上以為然孫叔敖芍陂西漢七門堰溉田不貲君
推尋故跡募民脩復屬邑坊場河渡已輸正錢又取羨
入公帑君皆蠲之淮人迄今有遺愛六年懇求歸養詔
與便郡遷朝請朝議大夫俄丁外艱服除主管武夷山

冲佑觀十三年起知鄂州上曰武昌凋敝藉卿撫摩行
名卿矣未至南市大火焚萬室客舟皆燼溺死千計君
馳往視事闢官舍出倉粟以待無所於歸之人弛竹木
稅開古溝創火巷以絕後患僚吏爭言用度將不足君
曰吾且瘠已肥人凡燕遊饋遺例冊所供下至車騎鼓
吹一切省去未幾公私交裕亟代民輸稅役麥子一年
郊恩封祥符縣開國男食邑三百戶轉中奉大夫十四
年再守甌寧奸猾求穀貴導飢民羣趨富家發其廩監

司議調兵掩捕君曰是趣亂也揭榜許自新而諭有力者平其價人以安堵邑尉獲盜希賞笞掠抵重坐君平反十三人俗喜鬪殺君按甲令禁私造軍器置義塚以瘞旅柩皆畫旨行之十六年豫章闕帥上親用君會樞臣出鎮改閩漕遂引嫌移江西轉運副使壽康皇帝覃恩轉中大夫初議減月椿君言及州不及縣則縣仍迫取於民猶不減也如本道興隆歲起十四萬緡撫州半之州不足率均外邑而邑之多寡自不均宜通一路裁


額若於下之漕臣酌郡縣偏重者均減之實惠乃可及
民又奏和買已白科從而折變益以靡費其數反重於
正絹江州德化縣倚閤逃戶稅而總領所猶督折帛請
併議蠲減諸州黠卒遇赦還為民害宜聽其留不則改
刺鋪兵凡所獻明見謂合宜閱半年除帥湖南首乞擇
郴桂守臣而賞其有治理效者嚴揀中禁軍教閱而劾
事藝不應格者後皆如君言凡代納潭州屬縣經總制
錢及放折米折粳頭脚等萬計又代輸善化縣兩鄉營

田米二分湘陰荒田正米五百斛停醴泉陵淶水渡錢
補以州用攸縣舊科黃河鐵纜歲萬六千緡其二留州
君既不取其一送使復為丐免其加惠斯民多此類會
臣僚請諸道節州貴寬屬縣君曰是吾心也又減七萬
緡巫唐法新假神言易十者詛其婦翁劉子光子光忿
甚募人支解易沉之江獄成以屍不經驗奏裁君曰是
可貸乎卒請殺之因毀淫祠勒他巫改業治行轉聞紹
熙二年遷秘閣脩撰招軍賞賜服金紫尋召還在道差

知鎮江府易泉州將赴丁母憂追慕切至築蓼庵以居
甫免喪而卒慶元元年六月二十四日也享年六十四
妻令人黃氏佐君事親以孝稱子男三人汝將廸功郎
撫州司戶叅軍汝石受命而夭汝正從事郎監泉州在
城鹽稅女二人長適從政郎新興化軍興化縣令謝好
古次早死孫女一人明年十月庚申葬邵武軍邵武縣
大坂之原君丰儀秀整襟度坦夷與人交緩急盡力年
壯氣盛時以功名自期尤喜論事如謂相位不可久虛

日中黑子郡國地震當飭邊脩理宗每嘉之屢欲用君
因奏進士任子自分兩塗仕州縣者不相下蓋由階帶
左右流弊至此頃楊時嘗論之今華貫清塗非進士自
不可至豈在二字宜如元豐官制有旨從之自後每為
議者所指無裹言矣所著詩文二十卷藏於家予識君
三紀中嘗同朝晚代君守長沙嘉其整暇又能集名士
裒圖志五十卷貫穿古今自為之序蓋知其才之高汝
將等以司馬蓬狀求銘乃為銘曰

昔在裕陵作成宗英養而教之以義濟仁粵踰百年
應若麟趾儒猷吏方與寒畯君才有餘皇眷實紆
三馳壯轡四提帥符聲名孔昭光我帝系猗歟盛哉
本支百世



文忠集卷六十三

欽定四庫全書

集部

文忠集卷六十四

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣黃嵩齡

欽定四庫全書

文忠集卷六十四

平園續稿二十四

宋 周必大 撰

神道碑四

文華閣直學士贈金紫光祿大夫陳公居仁神

道碑 慶元五年

士大夫行誼著於鄉文章顯於朝豈弟布於郡國有一
焉足為名臣況兼是三者乎求之近世吾同年陳公其

人也公諱居仁字安行曾祖砥妣林氏祖嘉謨贈右朝奉郎妣安人黃氏父豪左朝奉大夫太府少卿累贈特進妣安康郡夫人蔡氏新平郡夫人汪氏七世祖自光州避地徙泉之莆田縣縣升軍故為興化軍人太府再娶汪夫人而家明州靖康初為汾州教授佐守臣張尅戢扞敵已有名後知惠州單車造賊壘降之鄞僧王法恩謀叛事覺誅戮將及無辜太府方為御史論救多得免人知其有後矣公幼不羣年十四而孤侍母依外氏

已能屬文門蔭起家右迪功郎信州鉛山尉中紹興二十一年進士第用舉主陞左從政郎移永豐令入監行在點檢贍軍政賞酒庫所糴場孝宗登極循左文林郎隆興改元脩高宗聖政時參政范公成大監和劑局與公並兼檢討官蓋異選也淮甸交兵魏丞相杞以宗正少卿使北辟公書狀官金人被甲彎弓夾道脅使者公馬上舉酒屬魏卿天寒醕此觴觀者壯之減歲幣成禮而還贊助為多先以格改左宣教郎用出疆賞轉承議郎擢諸王宮大小學

教授遲次久之乾道六年四月始供職明年秋徙軍器監主簿充國監發解點檢試卷官宗正脩玉牒賞厚適丞闕朝士競求之宰相知公恬靜八年春堂帖兼權會輪對論立國當定規模號令不可輕改四月遷將作監丞十月轉國子丞九年進丞秘書歷朝奉朝散郎中興會要成轉朝請郎再對論文武並用本以求偏若智謀勇畧未進而便佞輕躁者得之將復有偏勝之患孝宗嘉納長貳闕公行省事議試太史局生與臺評異不自安請外不聽郊恩賜服緋魚權禮部郎

官淳熙元年再求去八月選知徽州陞辭上曰政成召卿矣
明日又對大臣稱其明練歛在五季為偏方夏稅特重祖
宗故輕之他郡輸絹率以十二兩惟歛十兩比歲戶部謂
不足度却之人以為擾上欲仍舊貫而慮輸有輕重吏得
病民每十二匹特蠲其二四年公適視事植二表庭下閱
中否親分之吏不能措手秋苗斛捐五升預造津渡巨舟
以待春漲省費十四五後遂為例決事公明隣有訟多詣
臺省乞付公御史間取文案復視歎曰真良二千石也奉

詔招軍公令願行者立燾下有雍彥恭貌頗異公詢奚自
泣云父有遺澤厄窮至此公立取文書保任官之士族感
歎積閱累轉朝請大夫秩滿邦人挽留間道乃得去入對
上諭以從臣言路多薦卿公請編類即位以來寬恤詔令
示民不忘又乞申戒輸絹之弊上曰改法賴卿方成實惠
又曰卿在郡便民五事內欲優十三項戰功朕極不忘此
輩既為國宣勞豈應老不加恤耶留為尚書戶部員外郎
命本下朝士再推會要賞上曰陳某治行第一可因是併

賞之特轉朝議大夫陞郎中兼行度支又兼禮部明年
春類試公試秋國子監解試皆為考官遷樞密院檢詳
諸房文字八年三月為右司郎中九年十一月進左司
十年轉中奉大夫檢正中書門下省諸房公事歷兼提
領雜賣場寄樁庫左藏封樁庫左藏南庫寄樁錢物及
左藏庫借撥封樁錢物左右史數闕上輒詔公攝侍立
官閤十一月假吏部尚書充金國賀生辰使十一年使
回轉中大夫遂除起居郎公徧歷宰掾精明詳審議事

間有未合必反覆辨析期協於理文書下六卿報應稽
緩公擿其尤者治之不以六卿尊貴而廢也獄案多所
平反或有聽斷必歸於平上每知之嘗奏湖湘運米遠
下昇潤江西及沂荆鄂迂滯勞費互易為便上謂非卿
體國誰能及此至是直前謝新命上曰卿端靖有文欲
寘清要久矣今綴近班有聞當入告尋兼同詳定一司
勅令明年兼權中書舍人御史奏僧寺寓樞子孫十年
不至即聽焚瘞公言期迫則緇徒得逞其私不肖子孫

亦或興訟請倍年數仍從州縣驗問上曰臺諫給舍議
事或相表裏如卿可謂和而不同矣郊祀前四日真拜
中書舍人以示簡記賜服金紫陞兼詳定勅令公言常
赦宥過弛欠患不及小民願因慶壽恩蠲四等戶身丁
之半五等盡免從之安定郡王子昭乞封妾為夫人公
執不可上大喜謂有補風教又論人主當執要母親細
務上曰亦覺叢脞他人未嘗及明旦令輔臣清中書之
務已而奏外郡財賦上曰方以陳某言諭卿等此當責

之監司丞相而下皆愧謝公又乞絕浮費汰冗兵計當
省之數議蠲除之目此富民要術也上深然之學士洪
邁知貢舉命公權直院上曰內外制向委數人今陳某
獨能辦官欲擇人信非虛語轉大中大夫高宗升遐醫
官王涇削官編置刑房非公所領公率給舍例御繳駁
涇坐決配思陵之役議者多請節費公謂袞頓可也酒
果三日不易可乎上泣曰微卿言朕何由知公屢以母
病乞去上不可內出珍劑以賜仍獎諭云卿盡忠知體

欲用為諫大夫頗疑左遷他日處卿中同亦諭政府陳
某久次方議峻遷會母夫人卒上嗟惜再三厚賻金帛
紹熙元年八月從吉壽康皇帝前期除公集英殿修撰
知鄂州三司鼎峙軍民訴訟交至公平心以應舉得其
懽心郡計仰征稅公寬而有制商賈輻輳境多曠土公
禁冒佃招流逋田疇日闢募人築大堤以防水患名之
曰萬金安樂寮居養貧病名存實亡公括閒田益之至
者如歸姦吐盜鑄沔鄂間千百為羣亂有萌芽或請調

兵迹捕公召民兵搃首密圖之立獲渠魁餘悉縱遣歸
農歲當大比閩士爭冒試轉運使右之公一切禁止治
為諸郡最三年春拜煥章閣待制十月徙知建寧府四
年轉通議大夫歲儉糴貴公自出儲粟弛逋欠以巨萬
計市道頓平間遇水旱祈禱立應俗素剽悍動輒殺人
又喜把持誣訴公親為文數百言疏其情狀厲以法禁
治鬪毆嚴甚旁觀弗救併坐之五年夏重華服藥遠方
傳聞沟沟浦城惡少煽亂至戕一家數人公擒捕送獄

今上登極大赦至公命戮之而自劾於朝先是觀察推官柳某死貧不能歸乳媼挾二子行丐於市公聞之給以粟帛命士人教養之德刑並施人方安其政會鎮江大旱調守良難乃以屬公覃恩轉通奉大夫十月至府力請發封樁粟擇委僚吏分場賑給時屏騎從潛往視之間遣市米江湖間大商人人知陳使君爭出米求售公區處有方誠意孚洽全活不可計他處流移亦賴需丐人謂自昔救荒未有如公者天塹萬艘銜尾一遇風

濤沉溺相望公訪古海鮮界港因飢民濬治之距城十五里舊造閘通江潮灌運河地勢素高力勞易朽公命疊石為斗門以機引水遇滂洩之猾僧廬江陰界囊橐不逞一日來訴邏卒浸擾公致詰而色動縛置獄中檄尉曹掩捕盡獲羣盜人以為神慶元元年冬荒政策功特轉正議大夫即代輸下戶稅增廣貢院新范文正公舊橋示餘力也明年七閩謀帥五月加寶文閣待制知福州閩公鄉部且嘗治富沙熟其風俗初入界飢民有嘯

聚者公部公迂兵遮擊之首惡雉經餘黨望風屏迹下車除監直之逋增貢銀之價嚴蠱毒之禁宮室犯法治不必怒內侍幹辦啓運宮者以例折簡具食公劾其慢免之甫中親舊憧憧來賀館待一出私錢慶弔則捐奉有差為士者隨才成就三年二月召赴闕次近郊以脾疾丐閒不允五月再請乃除華文閣直學士提舉江州太平興國宮就賜對衣金帶歸而納祿轉正奉大夫疾革語諸子曰吾欲刻碑先塋斥田兩頃為義莊二事未

就以是付汝言訖而卒六月甲寅也遺表聞贈金紫光祿大夫享年六十九爵自蒲田縣男至奉化郡開國侯食邑通一千二百戶妻碩人王氏贈朝議大夫居隱女先公十三年卒葬鄞縣豐樂鄉橫溪西輿之原是歲十二月甲申諸子奉公柩合葬焉子男六人輩故宣議郎嘗魁國子華畢未命而亡曰希兩試南宮今為通直郎新知湖州武康縣曰卓踐世科今為宣教郎新知紹興府餘姚縣阜承奉郎義方之教有自來矣一女早夭

孫男四人允協承務郎允迪允脩允諧孫女五人長適鄉貢進士石渠次許王埜餘尚幼初太府自莆徙鄞故鄉田廬推輿羣從鄞產雖薄公念季父貧請於母而中分之既仕復輟俸為畢婚嫁女弟出適又鬻田以資之上登極遣甥王激表賀補將仕郎其孝友類此公風猷粹穆資性忠厚處已應物一以誠信事賢友仁心無媚忌樂施周急不計多寡交際之間和氣可掬人負已亦弗校及臨事則毅然有守不可間干以私立朝每以忠

言至計裨當路故相陳正獻公嘗薦公有父風汪端明
應辰韓尚書元吉程尚書大昌楊待制萬里當世儒宗
文師推公為名勝在禁近盡言無隱變帥林栗擅格制
書上怒不測楊待制以秘書少監論事外補公皆上奏
揀止歷典數郡率乘旱歉匱乏公悉心措畫責成其下
人樂宣力政事日脩財用自足寬嚴適中號稱循吏所
至皆立生祠道出舊治迎餞塞塗平生不以私喜怒加
人退食澹然讀書宴坐置家事不問居室以澹為名容

至承顏接辭自謂鄙吝可消爭心可弭也所著制稿
奏議二十卷詩文班左櫚芳各十卷芾等知予與公
厚善以公外弟翰林樓尚書鑰之狀遠來請銘予常
愛唐中書舍人王仲舒為政有古風守峽娶蘇三州
晚帥江西有治理效韓文公既誌其墓又為神道碑
其詩曰志儒之本達士之經有直有諷以志遠名翔
於郎省騫於禁密發帝之令簡古而蔚又曰久淹
於外歷守大郡所至極思必悉利病化成有代思以

勞虛位而俟忽隨滔滔嗚呼孰知數百載之後斯
言殆為公設歟鄙辭尚何所措姑拾此意而為之銘曰
文與行偕治民允懷左右具宜古難其才有美陳公柔
惠且直沉酣載籍如嗜飲食入而事君謀猷孔嘉累載
代言熒然詞華出而承流威愛兼濟五州去思亶其豈
弟帝曰汝來將圖爾庸胡不慙遺奄兮告終公如仲舒
我愧韓子誰其採詩尚告太史

資政殿大學士左大中大夫參知政事贈太師

張忠定公燾神道碑

乾道二年四月旦資政殿大學士右中大夫致仕張公
薨於饒州德興縣之里第是歲十二月甲申葬本縣鑄
印臺先塋之側其子既類行實聞於朝謂某嘗以文學
掾事公於昇謁銘詩揭墓道義不得辭按張氏世家德
興唐宰相文瓘之後子孫散居縣之諸鄉衣冠不絕國
朝多以進士入官公曾祖諱潛通直郎致仕贈太子少
保妣壽安縣君葉氏贈清河郡夫人始居吳園長沙王

為故里也祖磐袁州萬載縣主簿贈太子少師妣長興
縣君程氏贈通議郡夫人父諱根元豐五年進士將改
京秩以近大禮亟欲升朝推恩祖父母遂致其仕歸養
四親年方三十一久之近臣交薦賜對再仕終秘閣修
撰淮南轉運副使文行俱高世號吳園先生公貴贈太
師妣南華郡君黃氏尚書右丞履之女贈秦國夫人公
諱燾字公安莊重嗜書右丞喜曰是兒骨聳神清他
日必貴將命以官會薨諸舅承先志奏補太廟齋郎公

猶州角學愈力入成均升上舍政和八年廷試問五運
六氣公對數千言極論陰陽消長天人精祲與夫裁成
輔相之道天子嘉之親擢第三授文林郎辟雍錄宣和
元年遷太學博士三年加丁內外艱服除再為博士充
南省檢點試卷官金人臨境靖康改元之正月李綱以
執政為親征行營使守禦京城辟兼機幕遷秘書省正
字四月解嚴特改宣教郎自李綱妻弟求補外時權要
親戚多在堂嫉之坐以越職言事送吏部明年高宗登

極改元建炎例復行營及宣撫司官屬之責降者以公
通判常州改湖州賜緋衣銀魚二年詔班巡社法於東
南聽民自脩器械結隆伍公條不便者十六事卒罷之
三年苗傅等謀逆臨安公適攝郡亟募兵三千入援乘
輿反正論勤王功特轉一官四月大赦求直言公上疏
曰陛下踐位於傾危中繼遭叛逆號令不能感動人心
政事不能壓人望卑詞厚禮祈還二聖未有以動感敵
情豈胸中之誠未脩乎又言賢不肖雜進大臣惟親舊

是用敵方陵犯乃欲議和淮寇縱橫乃欲實粟京師疎繆如此而侍從不言臺諫不論其職安在又言巡幸所至未免營繕越棲會稽似不如是疏入不報請主管台州崇道觀紹興二年春駕自越回臨安宰相呂頤浩薦公召對論三事其一曰天下之病極矣醫國者未見治效願定國事以某事為本某事為末某事可因某事可革規模既立以次行之其二曰昔之致禍由縉紳以僥倖相師世俗以侈靡相夸官府賄賂公行將帥偃蹇自

肆州縣誅求無藝百僚偷墮廢弛今皆有之其三曰陛下欲整軍而求一樞臣不可得欲理財賦登銓曹而吏戶部長貳每難其人古不借賢於異代在陛下加之意而已除尚書司封員外郎再輪對及聖學上有取法唐太宗之語公曰陛下誠欲取法必用賢必納諫今所謂房杜王魏誰乎且太宗英武百戰百勝乃者手詔明言扞外敵援中原而實圖退避之計何也又請早定國論詞甚剴切於是置修政司講求治要命宰相提舉自公

發之五月詔在內職事官在外監司守令及曾任郡守
郎官以上者各述所見公因極言時事乞復置御營司
分諸將為六軍命大臣大將為使副各典一軍以收兵
權舉淮南之地分置征鎮使自戰自守又乞躬行實德
以率百官皆他人未嘗言者六月擢起居舍人秦欲知
敵情莫如厚設爵賞廣募間探事皆預脩毋蹈往歲維
揚之失尋詔都督府各沿江諸將如公言是秋上欲用
故相朱勝非代秦右相檜先以侍讀詔而給事中程瑤

中書舍人胡世將執不可劉一止為左史公為右史次
當書行亦謂不可又命左司林待聘右司樓炤攝承皆
辭六人並以宮觀罷五年宗祀赦復直顯謨閣積階左
朝散郎六年秋再以起居郎召入謝上曰久不見卿殊
渴嘉言公力論風俗久壞必盡掃而更張之又言二史
職廢乞用唐制羣臣奏對史官侍傍事必記言必書一
日宰執更互留身公曰公事公言今五六執政人各進
說殆非同寅協恭之義暫權給事中改兼外制七年二

月真拜中書舍人賜服金紫公感激上知政事闕失盡
言無隱金陵宮室未脩置脩內司命宦者王鑑領之鑑
侵聖祖殿基營私第部曲多占民居其使臣儲毅托名
御莊冒占腴田大為奸利會日有訴者按驗得實止鑄
毅官公曰此與宣和間李彥西域所公田何異毅不足
道鑑實使之上為逐鑑仍罷御莊言者論司農少卿樊
賓屯田員外郎王弗提領營田擾民無益以其事歸帥
漕而召賓弗還朝公繳奏二人皆罷都督府脩造建康

城期會迫促又以軍儲不足夏稅正絹每疋折錢八緡
公言行宮甫畢不宜復興大役民力已困折變何以堪
之詔罷築城而折帛減二十至今以為例張丞相浚兄
浟自蜀來既除職與郡又賜出負公與張公同年相善
勸其力辭張公迫世命難之即繳奏竟寢觀望者乃指
公論他事異同罷為提舉台州崇道觀公不以兵部尚
書呂祉代劉光世統軍合肥為然至是鄧瓊殺祉率全
軍數萬人以去上記公言加集英殿脩撰八年四月召

拜兵部侍郎公奏臣屢言規模先定乃可為國遷都大事也期年之間方進臨安復退還浙輔弼重任也一紀之間下命相之制者十有四進退執政無慮二十餘人規模安在上曰非不欲立規模正緣宰輔數易耳六月兼權吏部尚書十一月又兼史館脩撰去冬金廢劉豫使來議和秦丞相再相主之朝論籍籍公請問可否於衆上乃令侍從臺諫即日條奏公上疏數百言大槩謂天方佑宋當自治以需天時屈膝事人非臣所知又率

侍從極陳大計嘗面折中丞龍如淵曰遠視其所舉君
昔薦七人後皆北面張邦昌今囁嚅附會墮其計中他
日必背君親矣監察御史施廷臣擢侍御史太府寺丞
莫將賜出身超拜起居郎皆上書迎合者翻黃下吏部
公執奏曰故事遷除未有如此之驟力詆兩人引疾卧
家秦素厚公命樓炤問疾許直翰苑公曰今日進退在
我遷官則在他人某惟有去耳秦語人曰張子公守政官
職不能動也徽猷閣待制黎確贈官前參政李回追復

職名公謂確等事僞楚而為之用並乞追奪其攝銓曹
遇事不苟如此是冬和議成復河南陝西境土九年正
月上以祖宗陵寢久淪異域詔公同光山軍節度使開
府儀同三司同判大宗正事士儂修奉洒掃賜銀絹有
差以二月己巳陞辭自武昌信陽入蔡頴五月丙戌至
安永軍戊子朝謁諸陵庚寅修奉畢辛卯由鄭歷汴宋
宿泗淮南以歸六月入對公奏頴年陵下石澗渴竭使
至而水流如故上驚異久之又陳使事十餘條如謂劉

豫初廢人情洵洵而我斥堠不明坐失機會謂鄺璦部
伍皆西陲勁兵今在河南尚有收用新疆賦租已竭而
使命絡繹推命支費猶用兵興時例願加裁損非甚得
已勿遣使以寬民力上悉嘉納七月除權吏部尚書首
論官冗半年間授官觀獄廟九百餘員坐糜廩祿虛理
資考方議革銓選之弊會四川制置使胡世將升川陝
撫副使成都謀帥上語宰相張某高明練達和政有守
可寬西顧但朕惜其去耳臺評朝論亦謂當留公力請

行九月除寶文閣學士成都府

闕

特製金帶以賜初

加佩魚宰相以官制為言而止公奏蜀困征徭臣當宣
布德意寬一路之民上曰豈惟本路凡四川寬恤悉以
付卿又奏主和者達蘭也今為其姪烏珠所戕勢必輸
平乞道京洛關陝謁世將於河地共議邊計至則謂世
將諸軍今戍陝西饋餉雖寬如緩急何宜歛兵脩蜀口
仍丐錢五百萬緡為儲積世將皆奏行之公以十年春
至益與世將尺牘交馳講畫素定是夏敵果叛盟窺蜀

吳璘及楊武郭浩大破之俘獲萬計其後公除西府
人唐文若草制云保蜀之功著龜先見蓋謂此也十
年詔世將納契丹降人公曰蜀地狹安能容且不鑒前
朝常勝軍乎世將奏寢其事蜀自用兵和預買匹布折
估錢二引民已病之至是轉運司迫餉軍增至三道成
都一路總七十四萬七千有奇公言昨降度牒二千稱
提前引數適相當願以此代輸從之初公開府適承歲
旱大發積粟以賑饑民撫存黎雅蕃部禁戢貪吏開脩

渠堰蠲落江田稅決遣獄訟脩文翁舊學時與諸生講
論經旨葺諸葛武侯廟杜少陵草堂新張乖崖祠政無
不舉蜀人大悅屢請代不聽十三年冬始命提舉江州
太平觀時舊人往往以異同得罪公家居絕口不言世
事取吳園先生遺編數百卷手自抄定又追先志斥俸
餘為義莊贍宗族自號雲山老人二十五年冬秦丞相
薨舊人在者皆起上首以帥鄉部兼行宮留守司公事
明年二月至金陵積歲負內庫錢帛鉅萬公悉奏免池

有義子與父爭訟守昏繆繫父連年不決公請移廷尉
黜其守居二年政成化治進瑞明殿學士考課累轉左
中奉大夫二十九年夏召赴行在公奏金主遷都和好
難保惟陛下儆戒無虞自反求治上喜曰久不聞卿議
論良沃朕心是夕公腹疾暴作亟請休致上大驚用前
執政禮除公提舉萬壽宮兼侍讀公再移疾給寬假還
鄉數月疾平連有旨趣覲公奏兩郡土名分宜早定上
曰朕懷此人矣人所難言開春當議典禮公頓首時風

俗侈靡財用匱乏公勸上止北貨之貿易省非時之賜
予罷土木減冗吏躬行節儉民自富足上嘉獎再三公
遂言甲庫萃工巧以蕩上心酤良醞以奪官課教坊員
數日增俸給賜資耗蠹不貲上曰卿可謂責難於君明
日罷甲庫諸局以酒庫歸有司減樂工數百人正除吏
部尚書侍讀如故金使施宜生來賀三十年正旦命公
館伴宜生閩人公以首丘桑梓語動之宜生雅敬公頗
漏敵情公乞早為之脩會疾復作力求納祿詞極哀切

上命湯丞相思退留公公請不已轉左中大夫加資政殿大學士致仕特給真俸公方去即降詔立皇子云明年冬起公再帥江東完顏亮已深入人情克懼公不敢辭亮死褒復未和詔沿江帥守條具進討恢復計人馳志幽燕公獨乞持重養威觀釁而動已而諸將追躡果無功尋以張忠獻公代公命公奏事公言前日邊遽義當強起今憊不能支矣復提舉江州太平興國宮三十二年六月孝宗受禪御札召公道除同知樞密院

事公懇辭又遣子埏入辭上命中使賁手札趨朝許乘
車至宮門給扶登殿問為治之要公言內治乃可外攘
今天下弊事至衆中外望治願如祖宗及太上紹興二
年五月手詔命百執事赴都省給札條具上大嘉御札
畧云覽燾所奏犁然有契於衷其令侍從臺諫集都堂
賜以筆札取當今弊事悉意以聞退各於其聽治之所
盡率其屬諭以朕意極言無隱於是士大夫平日欲言
不能自達者纖悉聞矣上皆親閱標識急務付公看詳

公請擇可行行之。覃恩轉左太中大夫。隆興元年三月遷參知政事。公以老病不拜。臺諫交章留公。上還公奏。且命宰相諭旨云。朕不敢煩公。以政姑為朝廷重可也。公辭益堅。上亦察其實病。遂除資政大學士。提舉萬壽觀。魚侍讀。恩數視政府。公援紹興末例。謁告將理。上乃許之。及家。因求致仕。詔從其請。後二年而薨。享年七十五。贈宣奉大夫。謚忠定。爵自德興縣男。累封鄱陽郡開國公。食邑通三千五百戶。食實封三百戶。後以子遇恩。

累贈太師娶程氏同郡徽猷閣待制鄰之女先卒追封秦國夫人二男朝議大夫荆湖北路提點刑獄公事垓朝議大夫廣南西路提點刑獄公事埏分符持節皆有家法一女適鄒忠公浩之子處州太守棚孫男十九人鑄朝散郎兩浙轉運司幹辦公事賜緋魚袋鎮通直郎荆湖北路安撫司幹辦公事鈺儒林郎福州錄事叅軍鏐承事郎鑑承事郎新差監鄂州在城鹽稅務鏐鏐將仕郎鉉鏐鏐館銷鏐鏐鏐鏐未仕孫女十四人長適周簡惠公葵之孫

奉議郎沿海制置司幹辦公事大辯次遠王恭簡公剛中
之孫承奉郎元老次遠嗣秀王伯圭之孫宣議郎新添差
淮西提舉茶鹽司幹辦公事希德次遠陳文恭公康伯之
孫通直郎僉書福州軍事判官廳公事景祖餘尚幼曾孫
一人濤脩職郎除南昌府新建縣主簿玄孫一人梟公外
和內剛臨事有仁者之勇在蜀四年尤著惠愛百姓皆繪
像以祀後帥李璆贊云公昔在蜀千載一人公今去蜀千
載其身願公再來以慰斯民蓋實錄也得謝復出以至大

用俸資往往積而不支平生清脩簡靜無所嗜好頗喜
大書書得顏魯公筆法望而知其為端人正士顯仁皇
后神主公所題也有外制二十卷奏議三十卷雜著二
十卷藏於家某竊惟公歷仕四朝始末可考早官成均
學術行誼人已推之欽廟初政以議論氣節有聲館閣
被遇高宗出入侍從越三十年知無不言而上不疑誼
形於色而下不忌世論名臣推以為冠小人雖間不說
終不敢妄有指議孝宗首從人望召寘二府將盡行平

昔之言而公老且疾矣退休於家以壽考終歷觀五十年間士大夫進退成敗殆非一端蓋時有險易道有屈伸或榮於前而辱於後或譽於上而毀於下求其常負重望始終全節如公者鮮矣宜有銘詩以信後世銘曰忠則不欺公則不私明則不疑正則不歌堂堂張公具美在茲學識卓然氣節隨之時有難易心忘險夷遇事極言見義勇為如壁如圭表裏無疵如著如龜計策無遺獨立近班國之表儀久任兩鎮民之父師紹興季年

大政方咨公曰憊矣祈哀以辭孝宗纂承元老來思
美疾益侵壯猷莫施位豈不高人歎辰遲壽豈不
遐人望期頤四朝遺直千載清規相彼先塋山川逶
迤公所自卜是祔是宜斲石刻辭以永厥垂

文忠集卷六十四

欽定四庫全書

文忠集卷六十五

平園續稿二十五

宋 周必大 撰

神道碑五

敷文閣待制贈少師張公

命神道碑 慶元五年夏

靖康陽九之厄強敵蹂踐封疆荐食無虛歲繼之劉豫
梟鳴河南高宗皇帝受命中興文武大臣經營四方期
雪讐恥而父母之念尤切於衷謂兵交使在其間每擇

忠義明辯之士問安沙漠項背相望十五年間能全節而歸者惟鄱陽洪忠宣公歷陽張公及新安朱并少章三人而已少章雖文士時以右選介別使不得專對惟洪惟張俱以儒學奮身官親八坐日夜以忠言說敵敵必欲臣之二公握節不屈則放之苦寒不毛之地衣食往往不給久之其酋長或知慕鄉稍遣子弟從之游賴以餬口如是一紀訓誘涵濡轉相告語知用兵弗戢自焚之禍迄成和好還徽宗梓宮歸我太母人固知聖主

之德文武大臣之功而潛導馴致易暴為善此兩公陰
有助焉歸拜白髮之親其子某亦直立光顯然張公之
子遇有舊數以故友朝請郎聞人阜民所述行實來請
銘乃參考史氏序而銘之公諱某字才彥和州烏江人
唐國子司業籍之後世儒家曾祖延慶祖補嘗預鄉薦
父幾鄉譽尤高贈金紫光祿大夫妣永寧郡夫人馬氏
公少傳父學宣和三年登上舍第旋丁外艱建炎元年
二月以迪功郎為衢州司刑曹事兼管檢法議刑二年

三月詔中外士民直陳時事公言有中原之形勢有東南之形勢今縱未能遽爭中原宜進都金陵因江淮蜀漢閩廣之資以圖進取不應退自削弱郡守胡唐老竒之三年給事中周望為江浙制置使逐捕苗傅劉正彥過衢問唐老僚吏孰可用唐老薦公以充準脩差使賊平望入西府九月公改承奉郎召對會遣泛使公毅然請行假禮部尚書特轉五官除直龍圖閣武臣楊憲副之二弟祁邠皆補官仍添差祁明州觀察推官奉母以

居公即日引道見敵監軍郎君達蘭於濰州逼公拜公
不可執寘昌邑尋徙密州柞山寨以兵守之四年夏公
聞捷懶過密以書抵之曰兵不在強弱在理曲直宣和
以來我非無兵也帥臣初開邊隙謀臣復起兵端是以
大國能勝之其後偽楚僭立羣盜蜂起曾幾何時電掃
無餘是人心天意未厭宋德也今大國復裂地以封劉
豫窮兵不已曲有在矣達蘭得書執付豫使用之公升
階揖豫以舊官呼之為陳君臣大義辭氣激烈豫怒繫

之獄楊憲遂降關半年豫知不可屈復以公送虜拘之
燕山園福寺紹興元年也公又為書言豫挾大國之勢
日夜南侵不勝則首鼠兩端勝如養鷹飽而飛耳終非
大國之勢利欲以間豫守者密以告敵取其書去益徙
公東北千餘里之中京後又北徙會寧府去燕三千里
先是完顏旻死傳其弟晟晟死旻之孫亶立三世頗厭
兵慕文教後生從公者皆習弦誦執經授大義爭饋錢
穀布帛公自分終焉金嘗肆赦許我使者因使歸其鄉

人人占籍淮北幸得稍南惟公與洪公朱少章實言家
江南十三年二月甲子金忽召三人者改館饋許之南
歸公以四月辛未至燕洪公先在五月朱自雲中至六
月庚戌同發永平館七月壬戌次汴京都亭驛道中有
輜軒唱和集公為之序八月庚子對行在除秘閣脩撰
主管祐神觀公奉使時轉五官吏部誤寫無出身擬奉
議良久方改朝奉郎公為上言前後使者如陳過庭司
馬朴勝茂實崔縱魏行可等皆徇國忘軀宜優恤其家

崔縱之樞臣挈以來乞勅葬以獎忠義上雖下其章當
路格不行尋諷御史論洪公斥守饒州公自以太夫人年
七十謁告歸覲方出門而諫官亦誣公在金不禮其副
遂改台州崇道觀居從其便非上意也十四年七月丁
太夫人憂疏食廬墓執喪盡禮初公出疆遇秦丞相於
昌邑以忠義相勉故公在喪相與通問公因歷叙金有
歸淵聖及諸王宗室意勸其遣使迎請秦浸不樂十六
年公服闋再奉祠十七年夏洪公以散官安置英州懼

竄謫上書言臣使北時道遇秦檜教臣堅持使節臣得奉以周旋又醫官榮州團練使季子厚語臣云檜在京嘗代徽宗皇帝移書尼雅滿述海上盟約及用兵講和利害結好基此會曹勛繳進其書詔付史館十九年四月遂除公敷文閣待制提舉江州太平興國宮磨勘轉朝散朝進郎屏居蕭寺食閒祿者十年二十五年秦薨上首起公知池州明年春至郡忽忽不樂踰時復請祠歸道由廣德軍假官舍居之六月丁酉公生朝也先一

夕沐浴就寢詰旦家人起為壽安卧逝矣轉朝奉大夫致仕遺表聞贈中奉大夫享年六十一後以子升朝累贈少師娶同郡李氏封令人前卒累贈魯國夫人二十年某月日葬四明西山母永寧郡夫人墓側三子孝覽朝議大夫通判平江府事孝曾朝議大夫直秘閣權福建路計度轉運副使孝忠朝請郎權知荆門軍三女長許嫁左從政郎臨府司法參軍沈洵而卒次適朝請郎權前知邵州唐準次適蘄州貢士袁如晦亦卒孫男

五人從之從政郎池州司理參軍徽之將仕郎改之登
仕郎元之將仕郎永之將仕郎孫女六人長適進士韓
師魏次適進士衛葆餘未嫁公平生孝友歸遇郊恩徧
奏諸弟後多顯者其在北方太夫人命猶子孝祥後公
公歸有子而鍾愛孝祥異甚已而魁多士掌書命為時
名臣諸子亦以才聞張氏之興庶其在此公天資勁偉
遇事慷慨酒酣耳熱悲歌憤激常以功名自許車駕留
江上強敵逆臣連兵入寇公冒險出使人皆危之及被

囚拘畧無悔懼賦詩作文考評史傳著述動盈編帙歸
獻所聞納忠於朝將有施為以償素志既不遂嘆曰身
在異域視死如歸為國事也今士大夫有告言連坐之
風一或抵罪家破名滅竟亦何裨悉取舊稿焚之惟晝
夜潛心經典學道日以有得無田無廬未嘗過而問焉
高宗更化方且進用而公無意斯世矣惜哉遺文十卷
蓋公身後所哀者銘曰

中興之功有隱有顯險難外扞憂虞內殄赫赫將相公

槐鼎鉉單車孰乘密指臨遣艱難險阻維繫轉輾如淪
蛟淵如探虎圈公曰不然蹈義者鮮忠信篤敬蠻陌可
免誠心洞開古誼丕闡以漸以漬以聚以辯野惟或馴
善意相勉迄漬於成績效奚淺萬里來歸宜舒而卷誰
其冒疾天則福善慈親迎門溫清重展若弟與子流慶
方行超然死生彰厥履踐昭以銘詩詔後悠緬

淮西帥高君

夢

神道碑

慶元六年

廬州高府君屢帥邊天子閔其勞有詔赴闕會君移病

請祠主管亳州明道宮者再升提舉者一素愛廬阜之勝因之母司徒氏於山南遂卜居於九江至是築室山堂日與賓客對諸峯飲酒賦詩間輿疾從山僧遊或累旬忘返意甚樂焉慶元四年八月十四日卒於家明年三月十日葬母塋之右訖事其孤叔獻衰經不遠數百里踵門泣且拜曰先君病甚命叔獻云我昔遣汝乞爾祖母之銘於周益公且載吾家仗義來歸及當時此叛盟始末詳實我死汝必往求文刻之墓隧以成吾志

叔獻為是暫捨几筵以求惟公哀許某侍帷幄竊見孝
宗皇帝內修政事欲掃穹廬而空之黃金招樂毅白壁
賜虞卿未嘗一日忘北向以君數畫安邊闢國之策由
是倚為長城鼎湖龍去君亦休矣於此深有感焉乃掇
朝請大夫新成都府路提點刑獄王源狀而次序之君
諱夔字仲一其先登州人曾祖鵬宣德郎知陵府松滋
縣因任海州遂家岫山縣妣周氏祖昇隱居不仕妣許
氏父溥贈中奉大夫妣令人趙氏司徒氏金人據中原

紹興十一年中奉舉族歸朝既講和例遣還憂憤以沒
君自少讀書過人文筆翩翩嘗舉於鄉恥仕敵廷三十
一年完顏亮謀入寇君奉母航海來歸特免文解魏勝
起義克海州張忠獻公都督江淮奏君下州文學權昫
山主簿母子得還里敵屢遣重兵攻城君為勝分守東
壁躬冒矢石圍解第功版授迪功郎隆興二年割棄海
內易太平州蕪湖縣主簿員外置郡守吳芾連委攝邑
奏其治狀乾道五年改賜將仕郎出身調荆門軍長林

尉六年上遣聘使議陵寢君以封事列進取三十條陳
北地山川險易將帥兵甲州縣芻糧及阿固達以來用
人得失賜對口陳方畧上大喜明日改承務郎添差安
豐軍籤判仍釐務八年諸司交薦召奏事至則分水塞
為五軍各置首領月給廩食責以教閱沿淮多盜北馬
上親札禁止君請毋市駒對境以絕其弊風馬牛皆縱
使歸大闢學舍邊人始知俎豆淳熙元年二月除直秘
閣再任上密諭君邊臣多言敵欲敗盟遣課者武功大

夫陳琛告知亳州大盤弟千戶者為敵所治欲委質本朝君力言生事誤國不可聽願擇將練兵以需機會上嘉納之會幕官章駟訴本路漕張士元奪其愛妾下君究實當路右士元君直之坐易施州地隣黠播君欣然奉母以行值歲歉餒死相望聚為義冢雙花發其上大姓譚汝翼一方巨蠹誣姪殺人將論如法君平反之其人後生二子泣謝曰活我父母者公也汝翼尋以惡積抵罪秩滿移知文州君先已單舸下峽五年八對除尚書

度支員外郎歲中徧攝五司宰士闕上欲用君宰相難
之六年五月上親擢司農少卿倉庾地卑君始梁空敷
板米以不腐七年湖北謀帥上曰高某有才除直龍圖
閣江陵府歲旱宴集饋遺皆罷力脩荒政劾守令奉行
不度者聞隣路忠萬二州易子而食即移粟萬計沂江
助之九年特轉一官再任西南蕃羅鬼國在真宗朝嘗
來驚馬後為羅殿國所限有導其假道沅州蠻界互市
如舊者君謂不可罷之徭人梁牟入省地劫民財君遣

將擒捕而釋其脅從江湖多劇賊君造飛江輕舸付神
勁軍盜發立得大姓吳氏囊橐亡命君破其家易置巡
檢寨距府十里有沙市鎮大商輻輳居民櫛比每患延
燒君下令按大巷通水道凡可使人皆勇為之丁母憂
十一年服除知揚州兼淮東安撫上念襄陽邊防尤重
十二年正月加秘閣修撰帥京西襄恃三山為險而中
峴居峴萬二山之間下視府城君置柵種木積糧貯甲
預為外禦內守之計又疏水渠古迹溉民田日以強弩

教神勁軍適有旨射鐵簾士已素習詔許附駐劄軍試
其藝多被賞者積木道迎勞及他郡互送錢八千緡增
市戰馬置大安監游北其中孳生蕃息用補騎軍之闕
一新學宮創閣奉御書治聲轉聞十四年二月進右文
殿脩撰再任幕府益整暇與其屬劉宗任洩纂襄陽志
四十卷該貫古今自為之序十五年八月改帥淮西君
上書言敵常自廬入寇如蹈無人之境非獨地勢坦夷
正坐城郭不修乾道中雖築十五里今浸隳圯謹圖上

新城制度惟陛下亟圖之上遣漕臣王厚之總領張抑都統制閻仲偕來相視請如君言詔三司共成之居無何病足求去紹興元年春徙知贛州歲儉州縣捕治丐穀者數百人誣以聚衆君皆釋之薄征緩刑就廩飢民以新城壁暇日率教授入學講經義增置弟子員監司欲廢併龍南縣以避瘴癘君執卷而止二年再帥廬州道令奏事俄改明州兼沿海制置司事首置兵籍刺舉將吏軍政肅然庫務以酒貫民追督高價君或蠲或代

償積弊以除大姓迫人至死君踈族適有居境內者請
求不遂則以語動君君下之獄取旨裁決人服其公猶
坐削一官與邊郡四年春復帥廬君每念城役未竟於
是裁節經費晝夜督視閱數月告成五年秋被召而君
不能造朝三歷亳祠遂致其仕積階至中奉大夫享年
六十有一葬地在南康軍星子縣丹桂鄉黃龍山先娶
同里杜氏宣教郎磐之女繼室以其妹並封令人五男
叔暘叔豹叔夜皆早世叔獻從事郎房州司理叅軍叔

夏將仕郎二女長適文林郎德安府觀察使王頤次
未行孫將仕郎庭瑞君事親孝謹睦族有恩既分俸周
從叔又官其子桐天資敏明遇事迎解長於論兵援古
證今動數百言屢更方面所至內欲固圉外圖恢復孝
宗嘗曰卿功名中人也薦舉屬吏將佐近二百人後多
知名有集十卷奏議三十卷銘曰

於皇孝宗德侔周殷欲信威於北地遂攄憤於西京若
時高侯謀紹營平嘗將屯於上谷亦馳至於金城何鉉

基之既立而機會之難乘未受呼韓之朝莫寓麒麟之
形悼夫君而太息宣遺恨於斯銘惟兆宅之允臧偕康
廬其永寧

吏部尚書鄭公

丙

神道碑

慶元六年

孝宗皇帝孜孜人才尤精擇於初常曰一寘周行遂階
顯用不審可乎既用矣察其直諒不欺則始終與之故
二十六年間侍從多名卿吏部尚書鄭公其一也公諱
丙字少融上世當五季時自安陸徙家福州長樂縣曾

祖芳祖馮父遇世有隱德公貴贈父宣奉大夫母王氏淑人公生穎異九歲能屬文日誦書萬言紹興十五年擢進士第補左從事郎平海軍節度推官秩滿充建州州學教授兩安定郡王令裕令諤參知政事楊椿辛次膺知樞密院事賀允中皆號名臣公適在所隸交章以薦改左宣教郎辛嘗語公官職易耳使人尊仰實難公服膺焉入為太學錄以父憂免二十二年內禪轉奉議郎為國子監主簿詔求直言公上從諫遠佞勤政用人

裕民練兵六事會辛公為御史中丞辟公檢法官隆興
元年十二月遷監察御史金亟求成朝論不一公謂不
可遽信明年六月出提點荆湖北路刑獄權攝之禁方
嚴荆襄制置使沈介用待次官行江夏令邊事方殷信
陽軍守臣陽委印赴制司公皆持檄鐫詰介怒奏乞引
避上不得已下遷湖南提舉常平茶鹽乾道元年直章
賊李金陷郴州焚桂陽軍尹寬起寧遠縣以應之衡邇
賊巢提刑託行部避其鋒常平亦置司在衡公兼程疾

趨督州將治城訓兵復諭常寧縣世忠洞常首李昂霄
發壯丁禦賊民恃以安公劾柳桂守棄城乞鄂軍濟師
糧餉不足發義倉佐之賊平協助為多二年春鄉人林
安宅為諫議大夫素不相合求主管台州崇道觀三年
起為成都府路轉運判官勅監四川類試革挾書繼燭
之弊虞丞相允文以樞臣為宣撫使集四路漕議事盛
稱公賢還朝薦召六年正月入對上喜曰卿初御史也
除尚書禮部員外郎時陳正獻公俊卿與虞公為左右

相高選王邸講讀官公直講王府與芮璉李顏穎劉焯
四人並命陳公去公亦出為江西轉運判官道直秘閣
改河南提刑有旨招振華軍二千帥司欲速至涅士人
公立命改正瀏陽縣歲歉豪右移粟售他境鄉民紛競
尉以嘯聚張大其事漕調兵追捕歸罪團長陳淮下之
獄公亟約常平司出米數千石彈壓賑濟杖淮釋之漕
有內援奏公姑息貶秩一等而罷衆論不平復提點廣
東刑獄適漕兄弟為經畧使公引嫌移使西路遠方官

吏不奉法公深行瘴鄉一裁以正邕守重賦歛得公束約請祠去歸正官沙世堅素武勇坐贓決配靜江部有劇賊未獲公諭世堅立功贖過世堅馘渠魁以獻公為奏稍復其官後平李接以總管守宜州一路賴之閩部鹽筴壞上雅信公徙本路轉運副使公知福之嶺口

闕

頭海口三倉本錢不繼命積錢對償又汀劍等號上四州高估抑售公委邑令置場支賣科擾頓絕至今守其法淳熙四年召為吏部郎中踰月兼中書門下省檢正

諸房公事議者謂舊法令官訴雪罪犯一歲別勘三歲
別定以防枉撓乃者有司憚煩須闕元勘官伏其誤始
許改正實抑之也章下三省公謂復舊便執政曰上意
似不然公厲聲曰事當問理若逆探上意而逢之豈大
臣事乎執政怒徙公大理少卿五年二月也尋充御試
編排官即殿幕擢秘書少監累轉朝散大夫車駕幸省
轉朝請大夫面賜金紫明日進秘書監不數日兼權中
書舍人會諫議大夫蕭燧論夔帥李景粦貪虐而大臣

庇之於是參知政事趙雄謂燧誤信蜀人謗書既捕治其人因改燧刑部侍郎尋出知嚴州公言臺諫弱奸邪反屈抑而去豈國家之福耶六年輪對奏乞四川襄漢江淮置三大帥擇曾任二府有文武威望者各當一面復列上五弊一曰取士代筆傳義出行富人以賄得科第二曰養兵冒名寄籍闕額不補懦弱不汰一有草竊輒動御前之軍三曰理財以橫歛預借重折苛征為能四曰刑獄放縱大辟淹留奏案五曰薦舉非權要請托

則謬舉親舊羣至殿陛徒有引驗之名上甚嘉納勝選
德殿御屏之上真拜中書舍人公疏官冗賞濫卿監丞
簿事簡備館職史官至二十員學官書局各以十數監
司郡守疊授三政參議歸正添差養老將校充滿外路
東宮徹章館閣進書雜流廝役例需賞典曰寵寵曰應
奉開河脩堰併賜蠲賦无時推恩他司錢物漕乞移用
尉不捕賊詭奏有功張大虛聲橫被醲賞累數百言上
批賞功遷職不以濫予丙言是也給舍寓書牘宜隨事

以聞又論臺諫獨員無助察官不應專取歷知縣人未
幾召用顏師魯張大經劉國瑞皆二千石郡刺史有聲
者聖政日厯中興會要成連轉朝議中奉大夫七年五
月除禮部侍郎仍兼外制公言司封法不許以官回授
封贈比多援例下至秘書省吏以無用之減年亦得之
請一切勿行詔可八年吏部尚書王希呂知貢舉公及
侍御史黃洽副之有沮公者謂丙洽皆福州人上曰恐
有偏邪然皆無私暨揭榜三人同對上曰考校甚公遠

方得人雖不分路可也轉中大夫兼給事中時遽待補
太學法公視臨安府學籍許試者三百餘人游士羣訴
臺諫宅至夜喧集公第公入奏待罪先是春坊陳龜年
女嫁大姓裴良珣良珣醉死其兄良顯訴龜年女利其
富死有冤狀事下臨安語涉龜年府尹不敢治上令送
大理寺朝士有為地者詔轉運司先審責良顯不實反
坐乃施行公駁奏語侵臨安且曰願少存國法為子孫
萬世之業竟送大理至是尹誅冒試人使逞恨上批無

罪可待令究其首者尹謂公此閩人不當深治上怒語
宰執呼尹諭旨卒杖丁如植編管隣州前戶部尚書韓
彥古負氣多援公因其起廢極口詆之至云仰累聖德
他日入謝因言論事欲激切語或過當望陛下恕罪上
曰朕自喜給舍得人樞密使王公蘭時為宗正丞亦為
上言今日不欺陛下惟鄭丙惜其闕莫助之耳九月兼
左侍郎乞文武添差官並不釐務有郭世革尋醫歲滿
參部法當察脉鑒有恃力受其賄公執送棘寺銓選清

平無敢干以私九月進權吏部尚書同修國史九年正月上卒執政當祈穀有故以侍從攝上特差公尋兼侍讀取陸贄奏議切時者反覆開陳進司馬光五規範祖禹帝資一覽嘗乞勿聽妄獻利害紛更庶事又論治賍吏太寬上並以為然次日舉二事諭宰執有安靜之褒八月正除吏部尚書轉大中大夫公常曰范鎮六十三歲致仕吾已遲一年上章請去十年二月除龍圖閣學士知建寧府政尚嚴明千里肅然浙東謀帥移知紹興

府以臧否郡守後時降中大夫上銳更法手札訪公欲
通差官理民部公謂通差害多著令里正專掌盜賊烟
火比來邑官責以應辦至於破產若以免役錢募耆老
供他役則善矣攢陵勅使闕驛輔藩多權豪公不少假
借郡起造訕公聞請祠上初不許適諫官亦部人助以
風聞竟提舉江州太平興國宮皇城邏卒因誣公載官
米萬斛而去漕遣其屬趙善后覈實無之上語執政使
鄭丙有是則今日無人可信矣秩滿再提舉隆興府玉


隆萬壽宮轉通議大夫起知泉州光宗登極語宰執曰
侍御史胡晉臣言初政當召用人才如鄭丙張大經楊
萬里是也尋詔公年德俱高踐駁滋久進端明殿學士
公應召上封事數千言以謹始為戒遇覃轉通奉大夫
治泉如治越或勸從寬公曰惟有德者能以寬服民吾
固非用猛者然嫉惡有素豈以晚節喪所守哉閱半年
改知潭州言者沮止易太平州固辭復提舉興國州轉
正議大夫紹興四年引年致仕轉正奉大夫時史丞相

浩汪尚書大猷沈參事樞右司郎中周頡與公皆同年
進士退休於二浙詩筒唱酬人競傳之俄屬疾屏醫藥
以後事付家人而逝五年八月十四日也享年七十有
四贈金紫光祿大夫子升朝特進爵安陸郡開國侯食
邑一千八百戶實封百戶妻淑人柯氏同郡右文殿修
撰裴之孫前卒以慶元二年十一月十二日合葬於懷
安縣沙溪之原三子頤孫故奉議郎通判辰州齡孫故
承務郎監潭州南嶽廟慶孫承務郎三女長適朝奉郎

知吉州太和縣卓洵次適通直郎知汀州上杭縣蕭輅
次適迪功郎道州司法叅軍柯謙宗孫男五人安祖似
祖並承事郎揚祖通仕郎餘幼孫女三人長適迪功郎
新泉州德化縣主簿葉莫公學術純正文辭贍綢有家
集外制奏議講議三十卷居鄉接物極其和易當官立
朝則氣節凜然上深重之是時繳駁之任不由進擬公
常以貳卿兼領感激盡言數犯貴要之鋒在銓部抑僥
倖懲姦欺蓋餘事也嘗薦蕭公燧胡公晉臣羅公點後

俱至二府可謂知人其他如李燾之博洽劉國瑞之清
正林栗林枏鄭澍之剛方唐仲友之學問援引不少置
善類歸心焉某在紹興間繼公為太學錄晚同朝久意
氣相投會都司用私意治王定國冒歸正賞予按都督
府文書辨其誤公奏都司方舉職政府乃欲沮之其不
黨同類此公之卒頤孫以刻見屬而不果今卓君亦公
友壻林御史采所狀行實乃參以聞見碑公墓道其銘
曰

維南有閩山環水聚是生良材接武王所挺挺鄭公如
松之喬碩大堅剛歲寒後凋持節典州彰善瘴惡既鋤
吏姦亦蕪民瘼帝思其賢禁密以騫守正觸邪知無不
言舉朝籤階當宁眷顧何待弼直乃為聖遇昔者漢武
明於知人欲稱汲黯近社稷臣相行將青任非不寵孰
如九卿敬禮加重以今準古庶其似之匪直公褒阜陵
是思



文忠集卷六十五